

**SKUPŠTINA HERCEGOVAČKO –  
NERETVANSKOG KANTONA**

297

Na osnovu člana 39. tačka f) Ustava Hercegovačko-neretvanskog kantona („Službene novine HNK”, broj: 2/98, 3/98, 4/00 i 7/04), Skupština Hercegovačko-neretvanskog kantona je na sjednici održanoj 28.06.2017. godine donijela

**ZAKON  
O DOPUNI ZAKONA O SUDSKIM TAKSAMA  
SA TARIFOM**

**Član 1.**

U Zakonu o sudskim taksama sa tarifom („Službene novine HNK”, broj: 4/09, 2/13 i 5/15), u članu 9. stav (1) iza tačke „j)“ dodaje se nova tačka „k)“ koja glasi:

„k) notari kada u ostavinskom postupku postupaju kao povjerenici suda“.

**Član 2.**

Ovaj Zakon stupa na snagu osmog dana od dana objavljivanja u „Službenim novinama Hercegovačko-neretvanskog kantona”.

Bosna i Hercegovina  
Federacija Bosne i Hercegovine  
HERCEGOVAČKO – NERETVANSKI KANTON  
SKUPŠTINA

Broj: 02-01-XXVI-184/17  
Mostar, 28.06.2017. godine

**PREDSJEDAVALA  
Šerif Špago, s.r.**

298

Na osnovu člana 39. tačka f) Ustava Hercegovačko-neretvanskog kantona („Službene novine HNK”, broj: 2/98, 3/98, 4/00 i 7/04), Skupština Hercegovačko-neretvanskog kantona je na sjednici održanoj 28.06.2017. godine donijela

**ZAKON  
O ZAŠTITI PORODICE SA DJECOM**

**I - OSNOVNE ODREDBE**

**Član 1.**

(Predmet zakona)

- (1) Ovim Zakonom, u skladu sa Zakonom o osnovama socijalne zaštite, zaštite civilnih žrtava rata i zaštite porodice sa djecom (u daljnjem tekstu: Federalni zakon), bliže se uređuje djelatnost zaštite porodice sa djecom, utvrđuju prava, uvjeti i način za ostvarivanje prava u zaštiti porodice sa djecom, postupak ostvarivanja prava, finansiranje zaštite porodice sa djecom, Dječja nedjelja, nadzor i druga pitanja od značaja za ostvarivanje zaštite porodice sa djecom u Hercegovačko-neretvanskom kantonu (u daljnjem tekstu: Kanton).
- (2) Na pitanja iz oblasti zaštite porodice sa djecom koja nisu uređena ovim Zakonom primjenjuje se Federalni zakon.

**Član 2.**

(Zaštita porodice sa djecom)

Zaštita porodice sa djecom, u smislu ovog Zakona, je pomoć porodici materijalnim davanjima, te pružanjem usluga stručnog rada, a radi pomoći u podizanju, odgoju i zbrinjavanju djece, kao i njihovom osposobljavanju za samostalan život i rad.

**Član 3.**

(Ciljevi zaštite porodice sa djecom)

Zaštita porodice sa djecom ima za cilj:

- a) osiguranje svoj djeci približno jednakih uvjeta za zdrav i pravilan fizički, intelektualni i emocionalni razvoj u porodici,
- b) pomoć u ostvarivanju reproduktivne uloge porodice, njezi, podizanju, odgoju i zaštiti djece i poboljšanju kvalitete života porodice sa djecom,
- c) razvijanje humanih odnosa u skladu sa načelima građanskog morala i solidarnosti.

**Član 4.**

(Povoljniji uvjeti za sticanje prava)

- (1) Djetetu bez jednog ili oba roditelja i djetetu s invaliditetom osiguravaju se povoljniji uvjeti u sticanju i ostvarivanju prava po ovom Zakonu.
- (2) Dijete s invaliditetom, u smislu ovog Zakona, je dijete s fizičkim, duševnim, intelektualnim ili čulnim oštećenjima, odnosno višestrukim oštećenjima koja ometaju njegovo potpuno i efikasno učestvovanje u društvu na jednakoj osnovi s drugima.